

## **Atuarfimmi naliliisarneq uppersaasiortarnerlu pillugit Namminersornerullutik Oqartussat nalunaarutaat nr. 3, 27. januar 2006–imeersoq**

Inatsisartut atuarfik pillugu peqqussutaanni nr. 8, 21. maj 2002–meersumi § 17, imm. 4 aamma § 18, imm. 1 – 3, inatsisartut peqqussutaatigut nr. 8, 15. april 2003-meersukkut allanngortinneqartoq, naapertorlugu aalajangersarneqarput:

### **Kapitali 1**

#### *Atuartitsinerup aaqqissorneqarnera nassuiaatillu*

**§ 1.** Atuartitsissutini tamani atuartitsinerup aaqqissorneqarnera, atuartitseriaatsit suleriaatsillu atorumasat ilanngullugit, periutsit, atuartitsinermilu atortut atortussanillu atugassanik toqqaasarneq atuarfiup siunertaanut, alloriarfiit ataasiakkaat siunertaannut, atuartitsissutit ataasiakkaat atuartitsissutillu qanitariissut siunertaannut aamma ilikkagassatut anguniagassanut naapertuuttuussapput. Atuartitsineq allanngorartuussaaq, atuartut ataasiakkaat pisariaqartitaannut piginnaariigaannullu naapertuuttuussalluni, tak. § 17, imm. 1 atuarfik pillugu inatsisartut peqqussutaanni.

*Imm. 2.* Atuarfiup pisortaata atuartitsinerup pilersaarusiorneqarnermigut aaqqissuunneqarnermigullu atuartunut tamanut unamminartoqartinneqarnissaa qularnaassavaa, tak. § 17, imm. 2 Atuarfik pillugu inatsisartut peqqussutaanni.

*Imm. 3.* Atuartitsissutini tamani ilinniartitsisoq atuartorlu suleqatigiillutik ingerlaavartumik anguniagassaliortassapput. Atuartup sulinissaa anguniagassaliarisimasat tunngavigalugit aaqqissuunneqartassaaq. Suleriaatsinik, periutsinik aamma sammisassanik toqqaanerit aalajangersaanerillu ilinniartitsisut atuartullu suleqatigiinnerisigut ingerlanneqartassapput, tak. § 17, imm. 3 atuarfik pillugu inatsisartut peqqussutaanni.

**§ 2.** Nalunaarusiaq atuartup ilikkagassatut anguniagassanut naleqqiullugu atuartitsissutini piginnaasaanik nalilersuinerit paasineqassaaq ingerlaavartumillu naliliineq, nammineerluni suliamik saqqummiussineq, aalajangersimasumik sammisaqarluni suliaqarneq allattariarsorlunilu misilitsinnerit tunngavigalugit tunniunneqassalluni.

**§ 3.** Ilassutaasumik oqaaseqaatit ilinniartitsisup atuartup atuarfimmi sulineranik, inuttut inooqataanikkullu inerikkiartorneranik aamma atuarfimmi inooqatigiinnermut peqataaneranik nalilersuineratut paasineqassapput.

**§ 4.** Angusat tunngavigalugit karakterit atuartup ilikkagassatut anguniagassanut naleqqiullugu atuartitsissutaasuni piginnaasaqassusaanik nalilersuinerit paasineqassapput.

**§ 5.** Nammineerluni suliamik saqqummiussineq ukiup atuarfiusup ingerlanerani atuartup nammineerluni suliarisimasaminik saqqummiussineratut paasineqassaaq.

**§ 6.** Ilikkagassatut anguniagassat paasineqassapput tassaasut alloriarfiit pingasut naammassinerini atuartitsissutini ataasiakkaani atuartitsissutillu qanitariissut ilisimaligassatut piginnaasaqarfigiligassatullu anguniagassat atuartut piginnaasaqarfigisassaattut naatsorsuutigineqartut. Ilikkagassatut anguniagassat ilinniagassatut naligiissillugit aggugaapput

ingerlaavartumillu nalilersuinnermut kiisalu alloriarfiit pingasuusut tulleriiaarlugit naammassinerini qitiisumit aalajangersakkanik naliliisarnermut tunngaviliisuullutik.

§ 7. Atuartitsissutit siunertaat tassaapput atuarnerup ingerlanneqarnera tamaat atuartitsissutini ataasiakkaani atuartitsissutillu susassaqaarfiini atuartitsinermi siunertarineqartussat. Atuartitsissutit siunertaat immikkoortunut sisamanut naligiissillugit aggugaapput atuartitsissutini ataasiakkaani aamma atuartitsissutit susassaqaarfiini isiginnittaatsinik assigiinngitsunik sisamanik ersersitsisuullutik, ukuusunik:

- 1) ilisimasassat piginnaasassallu,
- 2) inummut imminermut tunngasut,
- 3) inooqatigiinnermut tunngasut aamma
- 4) kulturilerinnermut inuiaqatigiilerinnermullu tunngasut.

## **Kapitali 2**

### *Iliuusissatut pilersaarussiaq naliliinerlu*

§ 8. Klasselærerip isumagisassaraa atuarfiup angerlarsimaffiullu oqaloqatigiinnissaat sioqqullugu atuartup minnerpaamik ukiumut marloriarluni ilinniartitsisuni suleqatigalugit iliuusissatut pilersaarussiaq suliaqartarnissaa.

*Imm. 2.* Iliuusissatut pilersaarussiaq makkuninnga imaqaassaaq:

- 1) atuartup anguniagassai ilikkagassatut anguniagassanut naleqqiunneqarsimasut,
- 2) angajullerni atuartup ilinniagarilerusutatut kissaatai.

*Imm. 3.* Iliuusissatut pilersaarussiaq ima ilusilersorneqartassaaq:

- 1) atuartup nammineq anguniakkaminik angusinissaanut tapersersuutaassalluni,
- 2) atuartup nammineq anguniakkani angusimanerlugit imaluunniit qanoq annertutigisumik anguniakkani angusaqarfigisimanerlugit nalilersorsinnaassallugu.

§ 9. Atuartitsinerup ilaatut atuartup ilinniartitsisuisa atuartup atuartitsissutigineqartuni pissarsiai ingerlaavartumik naliliiffigisassavaat. Atuartup nammineq imminut nalilersornera aallaavigalugu naliliisoqartassaaq.

*Imm. 2.* Naliliinerup ukununnga tunngavissaliinissaaq siunertaraa:

- 1) atuartitsinerup pilersaarusiorneqarnerata ingerlateqqinnissaa,
- 2) atuartumut taassumalu angajoqqaavinut atuartup atuaqqinnissaa ilinniagaqatiginnissaalu pillugit siunnersuinissaa,
- 3) § 15-imi taaneqartutut ilinniartitsisup nalilersuisarnissaa.

§ 10. Ilinniartitsisup ingerlaavartumik naliliinerminut atuartitsinerullu aaqqissorneqarneranut atugassaminik atuartut ataasiakkaat, klassip ingerlaqatigiilluunniit tamarmiusut atuartitsissutigineqartunit pissarsiaqarnerisa iluini ineriartorneq malinnaaffigissavaa. Akuttuallaanngitsumik atuartut ineriartornerat ataasiakkaarlugit ataatsimoortillugilluunniit oqaloqatigiissutigineqartassaaq.

*Imm. 2.* Atuartitsinermi suliaassiissutigineqartunut tunngatillugu, angerlarsimaffimmi suliaassiissutit ilanngullugit, atuartup suliai naammassisaalu pillugit allakkatigut oqaasiinnakkullu oqaaseqaatitut ilusilerlugit ilinniartitsisoq nalilersuisassaaq.

### **Kapitali 3**

#### *Atuarfiup, angerlarsimaffiup atuartullu akornanni attaveqatigiinneq*

§ 11. Atuarfiup angerlarsimaffiullu akornanni attaveqatigiinneq makku aqputigalugit isumagineqassaaq:

- 1) atuarfiup angerlarsimaffiullu akornanni oqaloqatigiinnernik ingerlatsineq,
- 2) angajoqqaanik ataatsimiititsinerit,
- 3) nalunaarusiat, atuartsinerup ingerlanneqarneranik paasissutissat, ilassutaasumik oqaaseqaatit angusaasullu tunngavigalugit karakterit pillugit angerlarsimaffimmut allakkatigut nalunaarutit,
- 4) angajoqqaat piumasaqareernerisigut akuersereernerisigulluunniit angerlarsimaffimmut pulaarnerit.

§ 12. Atuarfiup angerlarsimaffiullu akornanni oqaloqatigiinnerit atuartumit, atuartup angajoqqaavinit, tassunga ilanngullugit angajoqqaarsianit imaluunniit atuartumik isumaginittunit allanit, ilinniartitsisuiullu peqataaffigineqartumik minnerpaamik ukiumut marloriarluni ingerlanneqartassapput.

*Imm. 2.* Atuarfiup angerlarsimaffiullu akornanni oqaloqatigiinnerit atuartup iliuusissat pilersarusiai aallaavigalugit ingerlanneqartassapput, angajoqqaallu ilaatigut atuartsissutini ilikkagassatut anguniagassat aamma ingerlaavartumik naliliinermi tunngavigineqartut angusaasullu pillugit paasissutissineqartassallutik. Oqaloqatigiinnissat erseqqinnerusumik angajoqqaallu ataasiakkaat isumaqatigiissutigineqartassapput, tassunga ilanngullugit imarisassat, piffissaq sumiiffissarlu; ataatsimiinnissaq sioqqulluarlugu angajoqqaat pingaartillugu oqaloqatigiissutigiumasaminnik kikkunnillu oqaloqateqarusunnerminnik kissaateqarnissaminnut periarfissaqassapput.

§ 13. Ukiup atuarfiusup aallartinnerani atuaqatigiit angajoqqaavinit ataatsimiititsisoqartassaaq. Taassuma saniatigut ukiup atuartsiviusup ingerlanerani angajoqqaat ataatsimiitinneqartarsinnaapput.

§ 14. Atuarfiup atuartoq nalunaarusiamik, atuartsinerup ingerlanneqarneranik paasissutissanik, ilassutaasumik oqaaseqaatinik immaqalu angusat tunngavigalugit karakterinik minnerpaamik ukiumut marloriarluni, novembarimi decembarimiluunniit aammalu maajimi juunimiluunniit, atuartut tunisassavai.

*Imm. 2.* Atuarfiulli 10. klassimi atuartut nalunaarusiamik, atuartsinerup ingerlanneqarneranik paasissutissanik, ilassutaasumik oqaaseqaatinik angusallu tunngavigalugit karakterinik novembarimi decembarimiluunniit aammalu aprilimi maajimiluunniit tunisassavai.

*Imm. 3.* Ingerlaavartumik naliliineq naapertorlugu atuartup ilikkariartornera, sulinera il.il. kiisalu tamatigut inerikkiartornera ernumanartoqartutut isummerfiusimappata atuarfik angerlarsimaffimmut nalunaaruteqartassaaq, atuarfiup angerlarsimaffiullu ataatsimoorlutik atuartup atugarisai taamaaliornikkut pitsannorsaaviginiassamatigik.

### **Kapitali 4**

#### *Uppernarsaasiineq*

§ 15. Atuartup atuartsinermik pissarsineranut uppernarsaasiinermi ilinniartitsisuisa nalilersueriaatsit makkua atussavaat:

- 1) nalunaarusiaq,
- 2) atuartitsinerup ingerlanneqarneranik paasissutissat,
- 3) ilassutaasumik oqaaseqaatit immaqalu
- 4) angusat tunngavigalugit karakterit.

*Imm. 2.* Atuartitsinerup ingerlanneqarneranik paasissutissat minnerpaamik makkuninnga imaqassapput:

- 1) piffissami pineqartumi akunnerit atuartitsiviusussatut pilersaarutaasut amerlassusaat,
- 2) piffissami pineqartumi akunnerit atuartitsiviusimasut amerlassusaat,
- 3) atuartup atuariatortarsimaneranut paasissutissat.

**§ 16.** Ilinniartitaanermut Pisortaqaarfik angerlarsimaffimmut nalunaarutit pillugit ilitsersuutinik, nalunaarusiat atorneqartarnissaannik karakteriliinermilu najoqqutassanik nassiussisinnaavoq.

### *Nukarliit atuarfiat*

**§ 17.** 1. klassimi atuartuq nalunaarusiamik, atuartup ilikkagassatut anguniagassanut sanilliullugu atuartitsissutaasuni piginnaasaqassusianik ataatsimut nalilersuutaasumik, atuartitsinerup ingerlanneqarneranik ilassutaasumillu oqaaseqaatinik imalimmik pissaaq.

**§ 18.** 2. aamma 3. klassimi atuartuq nalunaarusiamik, atuartitsinerup ingerlanneqarneranik paasissutissanik ilassutaasumillu oqaaseqaatinik pissaaq.

*Imm. 2.* Atuartuq atuartitsissutini atuartitsissutinilu qanitariissuni ukunani tamani nalunaarusiamik pissaaq:

- 1) kalaallisoornermi,
- 2) qallunaatoornermi,
- 3) inuiaqatigiilerinermi,
- 4) upperisalerinermi isumalioqqissaarnermilu,
- 5) matematikkimi,
- 6) pinngortitalerinermi,
- 7) inuttut inerikkiartornermi aamma
- 8) sumiiffinni toqqagassani.

**§ 19.** 3. klassimi maajimi juunimiluunniit nalunaarusiap suliarineqarneranut atugassamik atuartut:

- 1) kalaallisut, qallunaatut matematikkimilu allattariarsorlutik misilitsissapput,
- 2) nammineq suliaminnik saqqummiussissapput.

*Imm. 2.* Ilinniartitaanermut Pisortaqaarfik ukiut tamaasa 1. decembari nallertinnagu aalajangiisinnaavoq atuartut allattariarsorlutik atuartitsissutit ukua ilaannik ataatsimik misilitsissasut: Inuiaqatigiilerineq, upperisalerineq isumalioqqissaarnerlu, pinngortitalerineq imaluunniit inuttut inerikkiartorneq. Ilutigitillugu Ilinniartitaanermut Pisortaqaarfik aalajangiisinnaavoq imm. 1, nr. 1-imi atuartitsissutit taaneqartut ilaanni ataatsimi misilitsittoqassanngitsaq.

*Imm. 3.* Atuartup atuartitsissutini atuartitsissutinilu qanitariissuni, allattariarsorluni misilitsiffiunngitsuni sumiiffinnilu ataasiakkaani toqqagassani sammisami ataatsimi, atuartup nammineq aalajangigaani, nammineerluni suliani saqqummiutissavai.

*Imm. 4.* Allattariarsorluni misilitsinneq nammineerlunilu suliamik saqqummiussineq pisassaaq piffissami marsimiit maajimut.

### *Akulliit atuarfiat*

**§ 20.** Akullerni atuartitsinermi atuortoq nalunaarusiamik, atuartitsinerup ingerlanneqarneranik paasissutissanik ilassutaasumillu oqaaseqaatinik pissaaq.

*Imm. 2.* Atuortoq atuartitsissutini atuartitsissutinilu qanitariissuni ukunani tamani nalunaarusiamik pissaaq:

- 1) kalaallisoornermi,
- 2) qallunaatoornermi,
- 3) tuluttoornermi,
- 4) inuiaqatigiilerinermi,
- 5) upperisalerinermi isumalioqqissaarnermilu,
- 6) matematikkimi,
- 7) pinngortitalerinermi aamma
- 8) inuttut inerikkiartornermi.

*Imm. 3.* Atuartitsissutini sumiiffinni ataasiakkaani toqqagassani atuortoq nalunaarusiamik ukununnga immikkut tamanut tunngasumik pissaaq:

- 1) assassorneq ilusilersuinerlu,
- 2) eqqumiitsuliorneq illussanillu titartaaneq,
- 3) timersorneq silamilu inuuneq aamma
- 4) nipilersorneq, erinarsorneq, aalaatsit isiginnaartitsinerlu.

*Imm. 4.* Imm. 3-mi atuartitsissutinik taaneqartunik atuortoq atuartinneqarsimangippat tamanna allassimassaaq.

**§ 21.** 7. klassimi maajimi juunimiluunniit nalunaarusiap suliarineqarneranut atugassamik atuartut:

- 1) allattariarsorlutik kalaallisut, qallunaatut, tuluttut matematikkimilu misilitsissapput,
- 2) aalajangersimasumik sammisaqarlutik suliaqassapput saqqummiutissallugulu.

*Imm. 2.* Ilinniartitaanermut Pisorta qarfik ukiut tamaasa 1. decembari nallertinnagu aalajangiisinnaavoq atuartut allattariarsorlutik atuartitsissutit ukua ilaannik ataatsimik misilitsissasut: Inuiaqatigiilerineq, upperisalerineq isumalioqqissaarnerlu, pinngortitalerineq imaluunniit inuttut inerikkiartornerneq. Ilutigitillugu Ilinniartitaanermut Pisorta qarfik aalajangiisinnaavoq imm. 1, nr. 1-imi atuartitsissutit taaneqartut ilaanni ataatsimi misilitsittoqassanngitsoq.

*Imm. 3.* Atuartut aalajangersimasumik sammisaqarluni suliaq suliaralugulu saqqummiutissavaat, atuartitsissutinik atuartitsissutiniluunniit qanitariissunik arlalinnik imaqartussaq.

*Imm. 4.* Aalajangersimasumik sammisaqarluni suliap suliarinera saqqummiunneralu allattariarsorlunilu misilitsinnerit piffissami marsimiit maajimut ingerlanneqassapput.

### *Angajulliit atuarfiat*

**§ 22.** Angajullerni atuartitsinermi atuortoq nalunaarusiamik, atuartitsinerup ingerlanneqarneranik paasissutissanik, ilassutaasumik oqaaseqaasianik angusallu tunngavigalugit karakterinik pissaaq.

*Imm. 2.* Atuortoq oqaluttariarsorluni allattariarsorlunilu angusat pillugit nalunaarusiamik angusallu tunngavigalugit karakterinik atuartitsissutini ukunani tamani immikkut pissaaq:

- 1) kalaallisoornermi,
- 2) qallunaatoornermi,

3) tuluttoornermi aamma

4) matematikkimi.

*Imm. 3.* Atuartoq atuartsissutini ukunani tamani nalunaarusiamik angusallu tunngavigalugit karakterimik pissaaq:

1) inuiaqatigiilerinermi,

2) upperisalerinermi isumalioqqissaarnermilu,

3) inuttut inerikkiartornermi aamma

4) allamiut oqaasiisa pingajuini, atuartoq atuartsissummut taamaattumut ilaaniarluni nalunaarsimappat.

*Imm. 4.* Pinngortitalerinermi atuartoq nalunaarusiamik ataatsimik immikkullu angusat tunngavigalugit karakterimik ataatsimik atuartsissutini ukunani pissaaq:

1) fysik/kemiimi,

2) uumassuseqartulerinermi aamma

3) pinngortitaleriffiusumik nunalerutini.

*Imm. 5.* Atuartitsissutini qanitariissuni sumiiffinni ataasiakkaani toqqagassani atuartoq nalunaarusiamik ataatsimik angusallu tunngavigalugit karakterimik ataatsimik sammisani ukunani tamani atuartsissutit siunertaanni taaneqartuni pissaaq:

1) assasornermi ilusilersuinermilu,

2) eqqumiitsuliornermi illussanillu titartaanermi,

3) timersornermi silamilu inuunermi aamma

4) nipilersornermi, erinarsornermi, aalaatsini isiginnaartitsinermilu.

*Imm. 6.* Atuartoq imm. 5-imi atuartsissummi ataatsimi arlalinniluunniit taaneqartuni atuartinneqarsimangippat nalunaarneqassaaq.

## **Kapitali 5**

### *Angusat tunngavigalugit karakterit*

§ 23. Angusat tunngavigalugit karakteriliinermi skala una atorpeqassaaq (13-skala):

13: Namminersorluinnartumik pitsaalluinnartumillu suliaqarnermi tunniunneqartarpoq.

11: Pitsaasumik namminersortumillu suliaqarnermi tunniunneqartarpoq.

10: Pitsaasumik sungiussiinnarpaluttumillu suliaqarnermi tunniunneqartarpoq.

9: Pitsaasumik, akunnakusoortumik ajunnginnerusumik suliaqarnermi tunniunneqartarpoq.

8: Akunnakusoortumik suliaqarnermi tunniunneqartarpoq.

7: Naammaannartumik, akunnakusoortumik ajornerusumik suliaqarnermi tunniunneqartarpoq.

6: Nalornisoortumik taamaattorli naammaginarsinnaasumik suliaqarnermi tunniunneqartarpoq.

5: Nalornisumik naammaginangitsumillu suliaqarnermi tunniunneqartarpoq.

03: Nalornisooqisumik amigaqisumik naammaginangeqisumillu suliaqarnermi tunniunneqartarpoq.

00: Atorsinnaanngilluinnartumik suliaqarnermi tunniunneqartarpoq.

## **Kapitali 6**

*Nammineerluni sulianik saqqummiussineq, misilitsinnerit, aalajangersimasumik sammisaqarluni suliaqarneq il.il*

### *Nalinginnaasut*

§ 24. Atuarfiup pisortaata atuartup ilinniartitsisuiuit siunnersorneqarluni siumullu atuartup angajoqqaavi oqaloqatigereerlugit atuartoq atuartitsissummi atuartitsissutiniluunniit qanitariissuni ataatsimi arlalinniluunniit immikkut ittumik atuartitaasoq imaluunniit naammattusaammik atuartitaasoq allattariarsorluni misilitsinnermi, aalajangersimasumik sammisaqarluni suliaqarnermi imaluunniit nammineq suliaminik saqqummiussinissamut atuartup peqataannginnissaa aalajangersinnaavaa.

*Imm. 2.* Atuarfiup pisortaata atuartup misilitsinnnginnissaa aalajangersimasumilluunniit sammisaqarluni suliaqannnginnissaa aaliangersinnaavaa atuartoq atuartitsissummi atuartitsissutiniluunniit qanitariissuni pineqartuni nammineerluni suliaminik saqqummiussissappat.

§ 25. Atuarfiup pisortaata atuartup ilinniartitsisuiuit siunnersorneqarluni siumullu atuartup angajoqqaavi oqaloqatigereerlugit nukarlerni akullerniluunniit atuartup, nunanit allanit, Danmarkimit Savalimmiuniilluunniit, Kalaallit Nunaannut nuussimasup, allattarissanik misilitsinnnginnissaanik aalajangiisinnaavoq atuartoq misilitsinnissaq sioqqullugu minnerpaamik ukiuni atuarfiusuni marlunni alloriarfimmi tassani ilaasimangippat.

*Imm. 2.* Atuarfiup pisortaata peqataanngitsoornissaq aaliangersinnaavaa atuartoq atuartitsissummi atuartitsissutiniluunniit qanitariissuni pineqartuni nammineerluni suliaminik saqqummiussissappat.

### *Nammineerluni sulianik saqqummiussineq*

§ 26. Nammineerluni suliamik saqqummiussinerup takutissavaa:

- 1) atuartitsissummi atuartitsissutiniluunniit qanitariissuni ilikkagassatut anguniagassanut toqqakkanut tunngatillugu atuartup angusimasai,
- 2) atuartup suliaminut tunniussimassusaa ilikkagassatigullu ineriartornera.

### *Nukarliit akulliilluunniit atuarfianni misilitsinnerit*

§ 27. Allattariarsorluni misilitsinnerit § 19, imm. 1 aamma 2-mi, aamma § 21, imm. 1 aamma 2-mi taaneqartut, Ilinniartitaanermut Pisorta qarfirmmit ingerlanneqassapput. Misilitsinnerit atuartut, angajoqqaat ilinniartitsisullu atuartup ilikkagassatut anguniagassanik qanoq angusaqarsimatigineranik nakkutigineqartumik nalilersuissutississavai.

§ 28. Ilinniartitaanermut Pisorta qarfiup nukarlerni akullernilu allattariarsorluni misilitsittoqarnissaa kingusinnerpaamik 1. decembari nalunaarutigissavaa. Nalunaarutigineqassaaq:

- 1) atuartut § 19, imm. 2-mi imaluunniit § 21, imm. 2-mi atuartitsissutit taaneqartut misilitsiffigissaneraat, aamma atuartut § 19, imm. 1-imi imaluunniit § 21, imm. 1-imi atuartitsissutit taaneqartut ilaanni ataatsimi misilitsissannginnerisut,
- 2) ikiuutit nalinginnaasut immikkullu ittut suut misilitsinnerni atorneqarsinnaassasut,
- 3) qaqugu qanorlu sivisutigisumik misilitsinnerit ingerlanneqassanersut,

*Imm. 2.* Misilitsinnermit inernerit Ilinniartitaanermut Pisorta qarfirmmut naliligassanngorlugit nassiunneqassapput.

*Imm. 3.* Ilinniartitaanermut Pisortaqarfiup misilitsinnerup ingerlanneqarnissaanut nalilersuinissamullu malittarisassat ersarinnerusut aaliangersassavai.

*Aalajangersimasumik sammisaqarluni suliaqarneq*

**§ 29.** Aalajangersimasumik sammisaqarluni suliaqarneq atuartsissutit atuartsissutilluunniit qanitariissut arlallit ilikkagassatut anguniagassartaannut tunngasuussapput.

**§ 30.** Klassip imaluunniit atuaqatigiiaat ilinniartitsisuisa atuartut suleqatigalugit pingaarnerutillugu sammineqartussaq ukiut tamaasa 1. februaari nallertinnagu aalajangiutissavaat. Sammisassaq ima atitutigisumik oqaasertalerneqassaaq atuartsissutit arlallit atorlugit qimerloorneqarsinnaassalluni.

*Imm. 2.* Pingaarnerutillugu sammineqartoq sammineqartunut annikinnernut aggulunneqarsinnaassaaq atuartsissutit atuartsissutilluunniit qanitariissut arlallit imarisaannik periaasiinillu aamma atuartunut tamanut unamminartuusunik suleriaasiinik saqqummiusseriaasiinillu imaqsinnaassalluni.

**§ 31.** Klassip imaluunniit atuaqatigiiaat ilinniartitsisui immaqalu ilinniartitsisut allat aalajangersimasumik sammisaqarluni suliaqarnerup ingerlanera tamaat atuartunik suliamut tunngatillugu ilitersuissapput.

*Imm. 2.* Ilinniartitsisut ilitersuinerata atuartut ataasiakkaat nammineq sapinngisatik soqutigisatillu aallaavigalugit makkununga tunngatillugu sulinissaannut periarfississavai:

- 1) sammisassap ataatsimik arlalinnilluunniit apeqqutitaqartup erseqqissarnissaanut,
- 2) aalajangersimasumik sammisaqarluni suliap imarisasaannik killiliinermut,
- 3) suleriaatsinik misissueriaatsinillu toqqaanermut atuinermullu,
- 4) atuartsissutit arlallit imarisaannik periaasiinillu toqqaanermut atuinermullu,
- 5) najoqqutassarsiorfissanik atortussanillu toqqaanermut atuinermullu,
- 6) saqqummiusseriaasissamik toqqaanermut atuinermullu,
- 7) pilersitassamik suliaqarnermut,
- 8) saqqummiussinissap piareersarneranut saqqummiussinermullu.

**§ 32.** Aalajangersimasumik suliaq aallartitsinnagu nalilersuinermi suut pingaarnerutinneqarumaarnerannik atuartut ilisimatinneqareertassapput.

**§ 33.** Atuartut ullunik atuarfiusunik tulleriinnik 3-5-inik paasissutissanik katersuinermut, sammisap suliarineranut, suliamik inaarsarnerannut suliamillu tamakkiisup saqqummiunnissaanut piareersarnerminnut atugassaannik periarfissinneqassapput.

**§ 34.** Aalajangersimasumik sammisaqarluni suliaq, atuarfiup periarfissiissutigisimasaasa iluanni, qanoq ilusilerlugu saqqummiussinissaannik qanorlu ilusilerlugu ingerlateqqinnissaannik atuartut namminneq qinersimasaannik suliamik naammassisamik kinguneqassaaq.

*Imm. 2.* Atuartut suliaminnik naammassininnerinut uiggiutiinnaarlugu saqqummiussisoqassaaq. Saqqummiussinermut ilaatillugu ilikkagassatut anguniagassanut toqqarneqarsimasunut tunngatillugu atuartup nammineq suliani nalilersussavaa.

**§ 35.** Aalajangersimasumik sammisaqarluni suliaqarneq atituumik allaganngorlugu naliliiffiqineqassaaq.

*Imm. 2.* Allaganngorlugu oqaaseqaat makkuninnga naliliinerussaaq:

- 1) suliap ilinniakkatigut imarisaa, tassunga ilanngullugit atuartitsissutip arlallilluunniit iluini atuartup tunngaviusumik ilisimasaminik pikkoriffimminillu qanoq annertutigisumik takutitsinera aammalu ilinniartitsussutinik pingaarnernik tamakkiisumik isiginnissinnaanera,
- 2) sammisamik suliaqarnerup ingerlannera, tassunga ilanngullugit atuartup sammisaminik itisilerisinnaassusia, atuartup ilaminik suleqateqarnera atuartullu sammisamut tunngasumik pilersaarusiorsinnaanera, paasissutissanik katersuisinnaanera suliarinneqqissinnaaneralu,
- 3) suliaq inigaq, tassunga ilanngullugit ilusilernera saqqummiunneqarneralu,
- 4) imarisaata atuartumit sammineqartup, atuartup suleriaasiata suliallu inikkap ilusilernerata saqqummiunneqarneratalu ataqtigiinnerat.

*Imm. 3.* Aalajangersimasumik sammisaqarluni suliaq ilinniartitsisunit

nalilersuiffigineqareersimassaaq kingusinnerpaamik saqqummiussinnermiit sap.ak. marluk qaangiutsinnagit.

## **Kapitali 7**

### *Napparsimaneq il.il.*

**§ 36.** Nukarlerni atuortoq napparsimanini allamilluunniit peqquteqarluni, tassunga ilanngullugit ilaatigut sila ilaqutariinnermiluunniit pissutsit, piffissaliussaq eqqorlugu nammineq suliaminik saqqummiussisinnaangippat, tamanna pillugu ukioq atuarfiusoq naatinnagu nutaamik piffissaliisoqassaaq.

**§ 37.** Nukarlerni akullerniluunniit atuortoq napparsimanini allamilluunniit peqquteqarluni, tassunga ilanngullugit ilaatigut sila ilaqutariinnermiluunniit pissutsit, allattariarsorluni misilitsissinnaangikkuni, sapinngisaq naapertorlugu periarfissaq siulleq atorlugu ukiorlu atuarfiusoq naatinnagu misilitsissaaq.

**§ 38.** Nukarlerni akullerniluunniit atuortoq allattariarsorluni misilitsinnissamut inortuippat inortuinalu ima sivikitsigisimappat suliaq pillugu ilitsersuutit pisariaqartut atuaqatini peqatigalugit pissarsiarisinaallugit, atuarfiup pisortaata atuartup misilitseqataanissaa akuersinnaavaa.

*Imm. 2.* Imm. 1-imi piunnaasaqatit naammassineqarsimanngippata, § 37 taamatutaaq atuutissaaq.

**§ 39.** Nukarlerni akullerniluunniit atuortoq qularutissaanngilluinnartumik unioqutitsilluni allattariarsorluni misilitsinnermi ikiortissimappat, atuartup misilitsinnermi suliaa atortussaa-tinneqassanngilaq.

*Imm. 2.* Atuortoq allattariarsorluni misilitsinnermi unioqutitsilluni ikiortissimappat, § 37 taamatutaaq atuutissaaq.

**§ 40.** Akullerni atuortoq napparsimanini allamilluunniit peqquteqarluni, tassunga ilanngullugit ilaatigut sila ilaqutariinnermiluunniit pissutsit, aalajangersimasumik sammisaqarluni suliamut tamakkiisumik ilaannakortumilluunniit peqataanngippat suliaalu ima annikitsigippat immikkut nalilerneqarsinnaanani, atuortoq tamatumunnga taarsiullugu atuartitsissummi/-tini atuartitsissutiniluunniit qanitariissuni tassani/taakkunani aalajangersimasumik sammisaqarluni suliaqarnermi sammineqartumik, nammineq suliaminik saqqummiussissaaq.

§ 41. Akullerni atuortoq napparsimanini allamilluunniit peqquteqarluni, tassunga ilanngullugit ilaatigut sila ilaqutariinnermiluunniit pissutsit, sammisaqarluni suliamik pilersaarutaasut malillugit saqqummiussinermut tamakkiisumik ilaannakortumilluunniit peqataangippat suliaalu ima annikitsigippat immikkut nalilerneqarsinnaanani, atuortoq tamatumunnga taarsiullugu periarfissaq siulleq atorlugu ukiorlu atuarfiusoq naatinnagu saqqummiussissaaq.

## **Kapitali 8**

### *Nalunaarusiat il.il. toqqortarineqarnerat*

§ 42. Atuarfiup nalunaarusiap, angusat tunngavigalugit karakterit atuartitsinerullu ingerlanneqarsimanera pillugu paasissutissat assilineri atuartup atuarfimmit anineranit ukiuni tallimani toqqortarissavai.

*Imm. 2.* Atuartup atuarfimmit aninerata kingorna angusat tunngavigalugit karakterit allattorsimaffiat atuarfimmi toqqortarineqassaaq.

## **Kapitali 9**

### *Atuutilersitsineq*

§ 43. Nalunaarut atuutilerpoq 1. marsi 2006, taamaattorli takuuk imm. 3 aamma 4.

*Imm. 2.* Nalunaarutip atuutilerneratigut Namminersornerullutik Oqartussat atuarfimmi iliuusissatut pilersaarutit, ingerlaavartumik naliliisarneq uppersaasiortarnerlu pillugit nalunaarutaat nr. 13, 11. juuni 2003-meersoq atorunnaarpoq.

*Imm. 3.* Kommunalbestyrelsi aaliangiissaaq atuartut ukiumi atuarfiusumi 2005/2006-imi qanoq qanorlu annertutigisumik allattariarsorlutik misilitsissanersut, nammineq suliaminnik saqqummiussissanersut aamma aaliangersimasumik sammisaqarlutik suliaqassanersut saqqummiussissanersullu, takuuk § 19, imm. 1, aamma § 21, imm. 1. Aalajangersakkat § 19, imm. 2-mi, aamma § 21, imm. 2-mi ukiumi atuarfiusumi 2005/2006-imi atuutissanngillat.

*Imm. 4* Atuartunut ukiumi atuarfiusumi 2003/2004-mi 7. klassimi qaffasinnerusumiluunniit atualersunut Namminersornerullutik Oqartussat meeqqat atuarfianni naliliisarneq il.il. nalunaarutaat nr. 24, 6. juuni 1994-imeersoq atuutiinnassaaq.

*Namminersornerullutik Oqartussat, ulloq 27. januar 2006.*

Doris Jakobsen

/

Karl Kristian Olsen